

Matxoelapijax carta, Juan lelpox

Jesucristo majt waj-ax Diosxotsepox

1 Xanal ampox lelx xamal matabijaliajwam akaseskolaxtat wəajna chajia dukponliajwa. Japonlap Jesucristo. Akaseskolaxtat japon duk, ampathat is-esal wətfuk. Hasta amwətjelbej japon dukaful. Japon kaen xajəp jiw bu'weliajwa, jiw pomatkoicha duilaliajwa Diosxotse. Tajut chiekal jəmtaenx, japon naksiya wət. Tajut chiekal taenxbej. Natachaemax japon is wət pachaempoxan. Tajut chiekal jachaxbej. Samata, jiw naewəajna Jesucristo pejwəajan. **2** Japon ampathatat wət, xanalxot dukpon. Xanal japon taenx. Samata, naewəajna nejthə'axtat taenxroxan, jəmtaenxroxanbej. Jesucristo majt waj-ax Diosxotse. Do jawəx, to'ason ampathatasik, dukaliajwapon, xanal səpich. **3** Xanal taenxroxan, jəmtaenxroxanbej, japoxan xamal naewəajna naexasisfulaliajwam, kaenejchaxoelaxliajwambej, xanal səpich. Xanal kaenejchaxoelax, waj-ax Dios səpich, Dios paxulan, pawəlpon Jesucristo, səpichbej.

4 Samata, lelx ampox carta xamalliajwa, xamalbej chiekal nejchachaemlaliajwam, xanal səpich.

Dios itliakaxpox

5 Jesús jəm-aech, jiw naewəajan wət: “Dios babijax is-el. Samata, japon, me-ama itliakax wət, ja-aechon. Itkəatax, jachi-elon” —aech Jesús, jiw naewəajan wət. Xanal tajut jəmtaenx, japon naewəajan wət jiw. Samata, xamal japawəajan naewəajnafulax. **6** Xatis jəmtis wət: “Xanal Dios naexasitx” —tis wət, pe nakiowa, isas wətfuk babijaxan, jatis wət, nakiowa kichachajbapijwaxaes. Jatis wət, duila-xisal diachwəajnakolaxtat. **7** Pelax xatis isfulas wət pachaempoxankal, me-ama Dios

isful pachaempoxankal, jatis wut, xatis, me-ama chiekal nakaewakolwas wut, jachiyaxaes. Jatis wut, Jesús, Dios paxulan, kaelel nakwepelsaxael babijaxan isaspojan japon pejjal pijaxtat, tup xoton cruztat xatisliajwa.

8 Xatis jumtis wut: “Xatis babijaxan is-esal” —tis wut, diachwujnakolax xatis wajut naekichachajbas. Japox jumtis wut, jumchi-esal diachwujnakolaxpox. Ajilbej diachwujnakolaxpox xatisxot. **9** Pe xatis babijaxan isaspojan chapaeis wut Diosxot, Dios nakbeltaeyaxael babijaxan isaspojanliajwa. Jasoxtat Dios nakbeltaeyaxael, japon pachaem xot xatisliajwa, me-ama japon jumdut. Puexa wajbabijaxan isaspojan kaelel nakwepelsaxaelon. **10** Dios chajia jum-aech: “Puexa ampathatpijiw babijax isla-ele-el. Puexa jiw babijaxan ispikal” —aech Dios. Pelax jumtis wut: “Xatis is-esal babijaxan” —tis wut, diachwujnakolax xatis naexasis-esal Dios jum-aechpox. Jatis wut, me-ama jumtis: “Dios kichachajbapijin” —tis asbuan jumch.

Jesucristo naksiyaxaelpox Diosxotse xatisliajwa

2 **1-2** Xamal, Jesús pejwuajan naexasisfulam xot, me-ama taxikola wut, ja-am. Xan lelax ampox carta babijaxan isasamatam. Asan aton nakiowa xamalxot babijax is wut, ja-aech wut, Jesucristo naksiyaxael Diosxotse, waj-ax Dios beltaelajwa japon aton babijax ispoxlajwa. Jesucristo babijax is-el. Pe pajut natapaeipon asajiw kimatamatlajwas cruztat. Jasox ja-aechon babijaxan ispi Dios beltaelajwas. Samata, Dios nakbeltaen, babijaxan isas wut. Jesucristo tuj wut, tupa-el xatiskallajwa. Japon tujbej puexa ampathatpijiwliajwa.

3 Isfulas wut Dios tato'alpox, xatis matabijaxaes, diachwujnakolax xatis matabijas Dios. **4** Aton jum-aech wut: “Xan Dios matabijtax” —aech wuton, pe naexasis-el wuton Dios tato'alpox, japon aton kichachajbapijin. Japon is-el Dios nejxasinkpoxan. Ja-aech wut, japon aton duka-el diachwujnakolaxtat. **5** Nejmach-aton chiekal naexasit wut Dios tato'alpox, japon xabich Dios nejxasink. Ja-aech wut, xatis matabijas, Dios suapich, kaeyax nejchaxoelspox. **6** Aton jum-aech wut jiwliajwa: “Xan Dios naexasitx” —aech wuton, japon chiekal dukaxael Diosliajwa. Me-ama Jesús chiekal duk pax Diosliajwa, jachiyaxaelbej japon aton, duk wut.

Pajeltato'laxpox

7Takoew, xabich nejxasinkaxpim, lelx Dios tato'alpox xamalliajwa, xamal nakaewa nanejxasinkaliajwam. Ampox pajeltato'laxa-el. Chajiakolaxtat xamal jumtaenam wut, naexasitam Jesucristo pejwujajan. Japatato'lax chajia xamal jumtaenambej. **8**Pe nakiowa, lelx pajeltato'lax wut, jan xamalliajwa. Diachwujajnakolax Jesucristo naewujajan xamal nakaewa nanejxasinkaliajwam. Xamalbej naksiyam diachwujajnakolaxpox. Samata, matabijam diachwujajnakolaxpox. Me-ama itliakax xenaful itkuataxxot, xamalbej ja-am.

9Nejmach-aton jum-aech wut: “Xan dukx Dios pej-itliakaxtat” —aech wut, japon aton nejwesla wut asew jiw, Jesús pejwujajan naexasiti, japon aton, me-ama itkuataxpijin wut, ja-aechon. **10**Aton nejxasinkpon Jesús pejwujajan naexasiti, japon aton dukaful itliakaxtat. Japon pajut natataeful babijax isasamata. **11**Pe nejweslapon asew, Jesús pejwujajan naexasiti, japon aton, me-ama nanuamt itkuataxxot. Matabijs-elon fulaeyaxael poxade. Itkuatax itliaklan, kiladofas xoton.

12Xan ampox lelx xamal, Jesús pejwujajan naexasitampimliajwa. Dios beltaen xamal babijaxan isampoxanliajwa, Jesús tɔp xot nejbabijaxantat. **13**Xan lelx xamal pakdiachwamliajwa, matabijam xot Jesucristo. Japon wujajna duk, ampathat ajil wutfuk. Lelxbej xamal pansiachwamliajwa, malecham xot dep pejpaklon Jesús pijaxtat.

14Lelxbej xamal Jesús pejwujajan naexasitampimliajwa, matabijam xot waj-ax Dios. Lelxbej xamal pakdiachwamliajwa, matabijam xot Jesucristo. Japon duk akaseskolaxtat, ampathat ajil wutfuk. Lelxbej xamal pansiachwamliajwa, chiekal Dios xanaboejam xot, naexasisfulam xotbej Dios pejjamechan, malecham xot dep pejpaklon Jesús pijaxtat.

15¡Nabej nejxasinke' ampathatpijajan! Ampathatpijajan nejxasinkpi, japi nejxasinka-el waj-ax Dios. **16**Jiw is wut pajut isasiapoxan, babijaxan, japoxan chaemil. Jiw xabich nejxasink wut asew jiw pejew, japoxanbej chaemil. Jiw pajutliajwa xabich naksiya wut, pejewliajwa, ispoxanbej, japoxanbej chaemil. Puexa ampathatat chaemilpoxan, japoxan Dios pijaxana-el. Japoxan ampathatpijaxankal. **17**Ampathat bijiat matatoepaful, babijaxan swapich, jiw nejxasinkpoxan isfulaliajwa. Pe jiw isful

wut Dios nejxasinkpoxan, ja-aech wut, duilaxaeli pomatkoicha Diosxotse.

Diachwujnakolaxxot, jaxot ajil kichachajbapox

18 Xamal, Jesús pejwujajan naexasitampim, matabijam mox pawujnapox that toepaliajwa. Xamal chajia jumtaenam Jesucristo padaelman pasaxaelpox. Ampamatkoiyan xabich nalaelaful Cristo padaelmajiw. Samata, xatis matabijas diachwujnakolax mox pawujnapox that toepaliajwa. **19** Japi jiw nakola xatisxot. Samata, xatis matabijas japi jiw naexasis-eli Jesús pejwujajan. Japi naexasit wut Jesús pejwujajan, japi xatisxotaxael. Pe japi jiw chajia wut xatisxot, diachwujnakolax japi jiw wajjiwa-el.

20 Puexa xamal chiekal matabijam, Cristo to'a Espiritu Santo xamal nejmatpuatanxotaliajwa. Japon xamal amwutjel kajachawaesful chiekal matabijaliajwam diachwujnakolaxpox, diachwujnakolaxa-elpoxbej. **21** Xan lelx ampacarta xamal matabijam xot diachwujnakolaxpoxan. Lela-enil, xamal matabija-emil xot diachwujnakolaxpoxan. Xamal chiekal matabijam masox diachwujnakolaxan. Matabijambej masox diachwujnakolaxana-el. Japi jum-aech wut diachwujnakolaxpox, jaxot ajil kichachajbax. **22** ¿Achankat kichachajbapijin? Kichachajbapijin, japon jum-aechpon: “Jesús Dios paxulna-el. Jesús Mesías-elbej” —aechpon. Japonbej Jesucristo padaelman. Japon naexasis-el Dios, Dios paxulanbej. **23** Nejmach-aton naexasis-el wut Jesús, japon Dios paxulanpon, japon atonbej naexasis-el Dios. Pelax nejmach-aton jum-aech wut: “Jesús Dios paxulan” —aech wut, japon atonlax Dios naexasit.

24 Samata, jchiekal naexasisfulde chajia akaseskolaxtat jumtaenampon! Ja-amsfulam wut, kaes chiekal xana-boejaxaelam Jesús, japon paxbej. **25** Jesucristo chajia jumdut pomatkoicha duilaxaespox japonxotse.

26 Xan ampox lelx xamal chiekal matabijaliajwam, masi jiw xamal naekichachajbasia. **27** Pelis xamal nejmatpuatanxot Espiritu Santo, Jesucristo to'akpon. Samata, xamal wewe'pael a sew jiw xamal chanaekabuanaliajwa, Espiritu Santo pajut chiekal chanaekabuanaful xot, puexa isaxaelampoxanliajwa, xamal matabijaxaelampoxanliajwabej. Espiritu Santo

pejnaewuajna x diachwujnakolax. Japanaewuajna x kichachajba-el. Samata, xanaboejim Jesucristo! ¡Nabej kofe! ¡Isfulde Espiritu Santo naewuajanpoxan!

28 Xamal, Jesús pejwuajan naexasitampim, ¡chiekal xanaboejim Jesucristo! Ja-amsfulam wut, duilafulaxaelam nejlewlaxat, hasta Jesús pejme pask wut. Japamatkoitat xamal nadalaxil Jesús pejwuajnael. **29** Xamal chiekal matabijam Jesús xabich pachaempon. Japonbej is pachaempoxan. Samata, matabijaxaes, jiw is wut pachaempoxan, japi diachwujnakolax Dios paxi.

Jesús pejwuajan naexasiti, japi Dios paxipox

3 Waj-ax Dios xabich naknejxasink. Samata, Dios nakwulduw Dios paxis. Diachwujnakolax xatis Dios paxis. Ampathatpijiw matabija-el Dios. Samata, japi jiw xatisbej nakmatabija-el. **2** Takoew, xabich nejxasinkaxpim, amwutjel diachwujnakolax Dios paxis. Pe wajut chiekal matabija-esalfuk wajbu'an asamatkoi nakwemachiyaxaelpox, tups wut. Xatis japox matabija-esal, Dios nak-itpae-elxotfuk. Pe nakiowa, matabijas, Jesucristo pejme pasaxoek wut, xatis japon taeyaxaes. Japamatkoitat wajbu'an, me-ama Jesucristo pejbu't wut, jachiyaxael kaenanula wajbu't. **3** Jesucristo pomatkoicha pachaempon. Is-elon babijax. Samata, kaenanula Jesucristo pejwuajan naexasichpis, chiekal duilafulaxaes. Me-ama japon, is-el babijax, jachiyaxaesbej xatis.

4 Puexa jiw babijaxan ispi, japi jiw is babijaxan Diosliajwa, Dios nejxasinka-elpoxan. **5** Xamal matabijam. Jesucristo pask ampathatasik babijaxan isaspoxan nakwepelsliajwa kaelel. Pe japon pajut babijax is-el Diosliajwa. **6** Samata, xanaboejapi Jesús, japi is-el babijaxan. Pelax jiw babijaxan isfulpi, japi jiw matabija-el Jesucristo. **7** Xamal Jesús pejwuajan naexasifulam xot, me-ama taxikola wut, ja-am. ¡Nabej tapae' asew jiw xamal naekichachajbaliajwa! Jesucristo pomatkoicha pachaempon. Japon is-el babijax. Samata, xamalxot isfulpi pachaempoxan, japi, me-ama Cristo wut, ja-aechi. **8** Satanás, dep pejpaklon, chajiakolaxtat babijax isful. Kofs-elon babijaxan ispoxan. Amwutjel nakiowa isfulbejpon babijaxan. Jiw, babijaxan ispi, japi Satanás pejjiw. Samata, Jesucristo, Dios paxulan, pask ampathatasik toesliajwapon Satanás ispoxan.

9 Dios pejjamechan naexasiti isfula-el babijaxan, japi Dios paxi xot. Diachwujnakolax japi Dios paxi. Samata, isfulaxili babijaxan. **10** Xatis chiekal matabijas, jiw isful wut pachaempoxan ampathatat, japilap Dios paxi. Xatis chiekal matabijasbej, jiw isfula-elpi pachaempoxan, nejxasinka-elpibej asew jiw, japilap Dios paxi-el. Japilap Satanás paxi.

Dios paxipi nakaewa nanejxasinkpox

11 Ampanaewujnax xamal chajia jumtaenam. Nakaewa nanejxasinkas wut, me-ama wajkoewkola nejxasinkas wut, jachiyaxaes asew jiwliajwa! **12** Xatis, me-ama wajwujnapijin, Caín, jachiyaxisal. Wajwujnapijin, Caín, babejenpon Satanás pijaxtat. Samata, boesapon pakoewan, Abel. ¿Ma-aech xotkaton pakoewan boesa? Abel ispoxan pachaem xot Diosliajwa, japoxliajwa Caín pakoewan boesa. Caín japoxan taen wut, xabich nusasiawalpon pakoewan Abelliajwa. Caín nejwesla pakoewan. Samata, boesapon pakoewan.

13 Takoew, ampathatpijiw jasoxtat xamal nejwesla wut, jnabey nejchaxoelanuile' japoxliajwa! **14** Xatis matabijas. Majt xatis Diosliajwa, me-ama tuspis wut, jatis, isfulas xot babijaxan. Pe Jesús pejwujajan naexasich wut, kofasbej babijaxan isaspoxan. Samata, duilaxaes pomatkoicha Diosxotse. Xatis chiekal matabijas japox diachwujnakolaxpox, nejxasinkas xot wajkoew, japi naexasiti Jesús pejwujajan. Asew xamalxot nejwesla wut asew jiw, Jesús pejwujajan naexasiti, japi jiwfuk, me-ama patupa wut, ja-aechi Diosliajwa. **15** Jiw, nejwesla wut asew jiw, japi, me-ama jiw beow. Xamal chiekal matabijam, jiw bapi asew jiw, japi duilaxil Diosxotse. **16** Jesucristo tup xot cruztat xatisliajwa, xatis chiekal matabijas, machiyaxaes, nejxasinkas wut asew, Jesús pejwujajan naexasiti. Xatisbej jachiyaxaes. Naknejsesit wut tupaliajwas, itupaxaes kajachawaesliajwas wajkoew! Japi xabich xatis nejxasinkas xot, jachiyaxaes japox. **17** Jesús pejwujajan naexasitpon, kimaeyan wut, pe japon kajachawaes-el wut asew, Jesús pejwujajan naexasiti, japi xabich wewe'pas wut kajachawaesax, kajachawaes-el wuton, japon itpaei nejxasinka-elpox japi jiw. Me-ama Dios nejxasink asew jiw, jachi-el japon kimaeyan. **18** Takoew, xamal jum-an ampox. Wajnejxasiyax asew jiwliajwa, jumchiyaxisal chimiajamechankal. Kajachawaech

wut asew jiw, Jesús pejwujajan naexasiti, jatis wut, itpaeis diachwujanakolax xatis nejxasinkaspoq japi jiw.

Dios paxi, padala-elpoq Diosliajwa, japi pachaem xot

19-20 Asew jiw nejxasinkas wut, Jesús pejwujajan naexasiti, jatis wut, xatis matabijas, xatis isas Dios nejxasinkpoq.

Pe babijax isaspoqliajwa xabich nejchaxoelafulas wut, nejchaemilas wutbej, ja-aech wut, nakiowa pachaemsfuk Diosliajwa. Dios kaes pejme pachaem. Me-ama xatis, jachi-el Dios. Puexa pajut matabijton xatis isaspoqanliajwa. **21** Takoew, xatis chiekal matabijas wajbu'wujajan jisalpoq Diosliajwa. Jatis wut, chiekal matabijas chiekal pachaemspoq Diosliajwa. **22** Dios nakchaxduiyaxael puexa wuljowspoqan, naexasisfulas xot japon tato'alpoqan, isas xotbej japon nejxasinkpoqan. **23** Dios nakto'a xatis naexasisfulaliajwas Dios paxulan Jesucristo pejwujajan. Dios nakto'abej nakaewa nanejxasinkafulaliajwas. **24** Dios tato'alpoq naexasisfulpi, japi jiw chiekal xanaboejaful Dios. Diosbej chalafulas japi jiw. Dios to'ak Espíritu Santo wajmatpuatanxotaliajwa. Samata, chiekal matabijas Dios nakchalafulpoq.

Amxot jum-aechpoq, ma-aech jiw duil wut pejmatpuatanxot Espíritu Santopi

4 Takoew, xamal xabich nejxasinkaxpim, jchiekal xan nanaewe'e! Xabich profetakola-eli, japi ampathatpijiw naekichachajbaful. Samata, najut natataeflam wut, jchiekal natataeflafulde! Asew jiw pajutliajwa najum-aech wut: “Espíritu Santo jum-aech xanalliajwa. Samata, xanal japoxan jum-an xamalliajwa” —aech wuti, jxamal kamta nabej naexasis japox! jMajt chiekal taem, diachwujanakolax japi jiw naewujajan wut Diosliajwa! **2** Ja-am wut, xamal chiekal matabijaxaelam, japi diachwujanakolax jum-aech Espíritu Santo pijaxtat. Jum-aech wuti: “Diachwujanakolax Jesucristo pat wut ampathatat, nalaelton kaeow atowtat. Me-ama yamxi ampathatat nalaela wut, ja-aech, Jesucristo nalaelt wut ampathatat” —aech wuti, japi jiw diachwujanakolax jum-aech Espíritu Santo pijaxtat. **3** Asewjax jum-aech wut: “Jesús Dios paxulna-el” —aech wuti, japi jiw Espíritu Santo chala-esal. Dios pejiwa-elbejpi. Japilax dep pijaxtat naksiya. Samata, japi Cristo padaelmajiw. Xamal chajia

jumtaenam Jesucristo padaelman pasaxoekpox. Pelis Jesucristo padaelman ampathatatlison.

4 Xamal naexasitampim Jesús pejuwajan, Dios pejjiwampim. Espíritu Santo xamalxotpon, japon kaes pejme mamnik. Me-ama Cristo padaelman ampathatat, jachi-el Espíritu Santo. Samata, xamal malecham naekichachajbapijiw, naexasis-emil xot japi naewuajanpoxan. **5** Japi ampathatpijiwkal. Samata, naksiyaful ampathatpijaxankalliajwa. Japi jiw naewuajan wut, ampathatpijiwkalpi chiekal naewech japi naewuajanpoxan. **6** Pe xatislax Dios pejjiw. Samata, Dios pejjamechan naexasiti naewuajnas wut, chiekal naknaewet wut, naexasitbejpi. Asewlix, Dios pejjiwa-elpi, naknaewes-el, naewuajnas wut Dios pejjamechan. Naexasis-elbejpi. Ja-aech wut, matabijas, masi jiw, pejmatpuatanxot Espíritu Santo. Ja-aech wut, matabijasbej, masi jiw naekichachajbapijiw.

Jiw nakaewa nanejxasinkaxaelpox, Dios xabich nejxasink xot pejjiw

7 Takoew, xamal nejxasinkaxpim, Dios pajut xatis nakajachawaet asew jiw nejxasinkaliajwas. Samata, nakaewa nanejxasinkafulaxaes. Nejmachjiw nejxasinkpon, japon Dios paxulan. Japon aton chiekal matabijtbej Dios. **8** Dios puexa jiw nejxasink. Nejxasinka-elpon asew jiw, japon aton Dios matabijs-el. **9** Dios to'ak wut kaekolan paxulan ampathatasik, japox is wut, Dios nak-itpaei pejnejasiyax xatisliajwa. Samata, naexasich wut Jesús pejuwajan, xatis pomatkoicha duilaxaes Diosxotse. **10** Dios jasox is wut, nak-itpaeipon nejxasiyax diachwujnakolaxpox. Dios to'ak kaekolan paxulan, japon tupaliajwa cruztat nakwemosliajwapon babijaxan isaspoxanliajwa. Xatis nejxasinkaspo Diosliajwa xabicha-el. Me-ama Dios naknejxasinkpox, jachi-el wajnejxasiyax Diosliajwa.

11 Takoew, xamal nejxasinkaxpim, jasoxtat xatis Dios naknejxasink xot, nakaewa chiekal nanejxasinkde kaenanula! **12** Xatis wajut tae-esal Dios. Pe nakiowa, xatis nakaewa nanejxasinkas wut, jatis wut, jiw chiekal matabija Dios nakchalafulpox xatis. Jatis wut, jiw chiekal matabijabej Dios pejnejasiyax kaesfulpox xatisxot. **13** Dios to'ak Espíritu Santo wajmatpuatanxotaliajwasik xatis wajut chiekal matabijaliajwas Dios pajut nakchalafulpox. **14** Xanal tajut taenx Dios paxulan.

Japoxlap asew jiw chapaeixbej, waj-ax Dios paxulan to'akpox ampathatasik japon bu'weliawja ampathatpijiw. **15** Aton, jum-aechpon: “Jesúslap, Dios paxulan” —aechpon, japon diachwujnakolax Dios xanaboejsful. Japon aton Dios chalafulas ampathatat.

16 Do ja-aech wut, xatis chiekal matabijas Dios naknejxasinkpox. Jawutbej, chiekal xanaboejas Dios pejnejxasiyax. Jiw, nejxasinkpi Dios, japi jiw diachwujnakolax Dios chiekal xanaboejaful. Japi Dios chalafulasbej. **17** Jasoxtat Dios pejnejxasiyax xatisxot kaesful. Samata, wajlewlaxil, Dios kastika wut jiw babejchow. Xatis wajlewlaxilbej, chiekal matabijas xot, xatis nakaewa nanejxasinkas, me-ama Jesús naknejxasink. **18** Jiw nakaewa nanejxasink wut, jaxot ajil pejlewax. Poklanejxasiyaxxot, jaxot atuaj pejlewax. Jiw pejlewla wut, japi pejlewla, chiekal matabija xoti kastikaxaespo. Samata, nejmach-aton pejlewla wut, japonfuk chiekal nejxasink-el asew jiw.

19 Dios matxoela naknejxasink xatis. Samata, amwutjel xatisbej japon nejxasinkas. **20** Aton jum-aech wut: “Xan Dios nejxasinkax” —aech wuton, pe japon asew jiw nejxasinka-el wut, japon kichachajbapijin. Japon aton nejxasinka-el wut asew jiw, taenpi, japon nejxasinka-elbej Dios, taeyaxisalpon. **21** Ampoxlap Jesucristo xatis nakjum-aech: “¡Dios nejxasinkpi, japi jiw nejxasinkbej asew jiw!” —aech Jesús xatisliawja.

Jesús pejwujajan naexasiti isaxilpox babijaxan, ampathatpijiw isfulpoxan

5 Puexa jiw nejchaxoel wut, jum-aech wuti Jesúsliawja: “Japon Mesías, Dios to'ason” —aech wuti, japi jiw Dios paxi nadofa. Aton nejxasink wut asan aton, japon nejxasinkbej japon paxi. **2** Samata, xatis waj-ax Dios nejxasinkas wut, isas wutbej Dios naktato'alpoxan, jatis wut, chiekal matabijas, xatis nejxasinkaxaes Dios paxipi. **3** Xatis Dios nejxasinkas wut, naexasisaxaesbej japon tato'alpoxan. Japoxan xabich tampoela-el xatis naexasisliawjas. **4** Puexa Dios paxipi, japi jiw duilafulaxael Dios pejkajachawaesaxtat babijax isasamata ampathatat, japi chiekal Dios xanaboejaful xot. **5** Naexasisfulpi Jesús, Dios paxulanpon, japi jiw isaxil ampathatpijiw isfulpoxan, babijaxan.

Jesucristo Dios paxulanpox

6 Jesucristo nalaelt ampathatat. Do baxael, jiw chiekal matabijaspon, japon Dios paxulanpon, bautisas w̄nton mintat, t̄p w̄tbejpon cruztat. Jaxot japon pejjal nakola. Samata, bautisaxkala-el. Boesasbejpon. Esp̄ritu Santo pajut j̄m-aechbej, achan japon. Esp̄ritu Santo j̄m-aech diachw̄ajnakolaxpoxkal. **7-8** Jiw chiekal matabija Jesucristo diachw̄ajnakolax Dios paxulanpon, japonliajwa Esp̄ritu Santo japox j̄m-aech xot, bautisas xotbej mintat, t̄p xotbejpon cruztat. Japanejchaxoelaxan, tres nejchaxoelaxanliajwa, jiw chiekal matabija diachw̄ajnakolax Jesucristo Dios paxulan. **9** Jiw j̄m-aechpox, diachw̄ajnakolax w̄t, xatis japox naexasich. Pe kaes pejme naexasich Dios j̄m-aechpox, pachaem xot naexasisliajwas. Samata, naexasisfulas Dios nakj̄m-aechpox paxulanliajwa. **10** Jiw naexasiti Dios paxulan pejw̄ajan, diachw̄ajnakolax japi jiw naexasit Dios j̄m-aechpox. Pelax jiw naexasis-eli Jesús pejw̄ajan, japon Dios paxulanpon, japi jiw nejchaxoel Diosliajwa: “Dios naekichachajbarijjin” —aechi, nejchaxoel w̄t, naexasis-el xoti Dios j̄m-aechpox paxulanliajwa. **11** Dios j̄m-aech ampox: “Xan jiw kajachawaetx taxulan pijaxtat pomatkoicha duilaliajwa xanxot. **12** Taxulan pejw̄ajan naexasiti, japi pomatkoicha duilaxael xanxot. Pelax asew jiw, taxulan pejw̄ajan naexasis-elpi, japi duilaxil xanxot” —aech Dios.

Taxdukanaew̄ajnanaxan ampacartatat

13 Xan ampaw̄ajan lelx xamal naexasitampimliajwa Dios paxulan, chiekal matabijaliajwam pomatkoicha duilaxaelampox Diosxotse.

14 Xatis chiekal Dios xanaboejas, matabijas xot, Dios naknaewet, xatis kaw̄ajnas w̄t, me-ama Dios nejxasink. **15** Xatis chiekal matabijas, Dios nakj̄m̄taen, kaw̄ajnas w̄t. Samata, Dios kaw̄ajnas w̄t, chiekal matabijasbej Dios nakchaxduiyaxaelpox, w̄ljows w̄t kaw̄ajnaxtat.

16 Taenam w̄t, Jesús pejw̄ajan naexasiti babijaxan is w̄ti, j̄piliajwa Dios kaw̄ajande! Dios kaw̄ajnam w̄t, japi Dios kajachawaesaxaes kofaliajwa babijaxan ispoxan. Ja-aech w̄t, pomatkoicha duilaxaeli Diosxotse. Pe asax babijax xabich

kaes chaemil. Japox jiw is wut, diachwujnakolax napelsaxaeli Diosliajwa pomatkoicha. Xamal taenam wut, asev, Jesús pejwujajan naexasiti, japox babijax is wuti, xabich chaemilpox, xan jumchi-enil: “¡Dios kawujajande japiliajwa!” —chi-enil. **17** Puexa babijaxan jiw is wut, japoxan chaemil Diosliajwa. Puexa japoxan Dios nejwesla. Pe puexa japababijaxan is wuti, japi jiw napelsaxil.

18 Chiekal matabijas ampox. Waj-ax Dios paxipi isfulaxil babijaxan, Dios paxulan, Jesucristo, tataeflas xot japi jiw. Samata, Satanás, dep pejpaklon, machiyaxil japi jiw tabejsliajwapon. **19** Xatis chiekal matabijas, Dios paxispis. Chiekal matabijasbej Satanás tato'alpox ampathatpijiw. **20** Xatis chiekal matabijasbej, Dios paxulan pask wut, japon nakkajachawaetbej xatis chiekal matabijaliajwas Dioskolan. Samata, xatis kaeyax nejchaxoels, Jesucristo suapich. Japon diachwujnakolax, Dios paxulankolan. Nakkajachawaetbejpon xatis pomatkoicha duilaliajwas, japon pajut duk xot pomatkoicha. **21** Xamal naexasitrim Jesús pejwujajan, ¡chiekal najut nataefulde ídolos kawujajnasamatam! ¡Kawujajnafulde kaen Dioskal!